

Dielangana dia Meji pa Lumu Luimpe lua Yone

No. 24

Bena Gelika badi basue kutangila Yesu

Bena Gelika bakuabo bakadi munkatshi mua bakaya kutendelela Nzambi ku disanka. Bobo bakalua kudi Filipino, muena Betesaida wa Galela, bakamuambila ne, Mukelenge, tudi basue kutangila Yesu. Filipino wakaya, wakambila Andele; Andele ne Filipino bakaya, bakambila Yesu (Yone 12:20-22).

Bena Gelika bakadi munkatshi mua bantu bakalua ku Yelushalema bua Disanka dia Kupita kua Yehowa. Musangu mukuabo bakadi bena lukonko, musangu mukuabo bakadi basue kutangila Yesu bua bimanyinu biakenzeye. Katuena bamanye.

Yesu udi wamba bua lufu luende

Yesu wakabambila [Andele ne Filipino] ne, Diba diakufika bua Muana wa muntu kutumbishibua. Bulelela, bulelela, ndi nuambila ne, Bikala lutete lua blé kaluyi lupone mu buloba, kaluyi lufue, nelushale nkayalu; kadi biafualu, nelukuamishe maminu makuabo a bungi (Yone 12:22,23).

Yesu wakambila Andele ne Filipino ne, “Diba diakufika bua Muana wa muntu kutumbishibua”. Mukelenge Yesu wakadi pabuipi ne kudifila mu bianza bia bena lukuna bandi ne kuya ku lufu luende ku tshianza tshia Bena Yuda ne tshia Bena Lomo.

Mukelenge Yesu wakadi biende bu lutete lua blé. Mu matuku makeke, kunyima kua lufu luende ku tshianza tshia bantu babi, balunda bende nebaladika tshitalu tshiende mu lukita lupia-lupia. Bena lukuna bandi, bakalua, bakateka tshimanyishilu ku dibue dinene diakadi ku mushiku wa mbelu wa lukita ne bakalulama. Muanjelo wa Mukelenge mufume mu diulu wakamusha dibue, wakashikamapu. Mulenge Yesu wakabika bu muakambeye. Balami bakazakala, bakalua bu bantu bafue (Matayo 27:68. 28:2).

Mupostolo Paulo wakafunda ne, Katataka Kilisto wakumana kubishibua ku bafue, bu mamuma a kukuama diambedi a bantu bakalala tulu mu lufu. Muprofete Yeshaya wakafunda bualu bua Mukelenge Yesu ne, Yeye neamone kanyinganyinga ka muoyo wende, neasanke; muntu wanyi muakane neavuije bantu bangi bakane ne kumanya kuandi kua Nzambi, neabatuadile malu mabi abo (Yeshaya 53:11).

Muntu udi muenzela Mukelenge Yesu mudimu, amulonde

Wasua muoyo wandi neaujimishe; wikala ne muoyo wandi udiye nawu pa buloba lukuna neaulame too ne ku muoyo wa tshiendelele. Biangenzela muntu mudimu, andonde; muena mudima wanyi neikale kundi ngikala; biangenzela muntu mudimu, Tatu neamutumbishe (Yone 12:25,26).

Bantu ba bungi badi bamba ne, Tudi Bena Kilisto, kadi kabena balonda Kilisto. Badi basue malu a ba pa buloba (buloba bua bobo badi bakoma Nzambi nyima, buloba budi muinshi mua bukokeshi bua Satana ne bamfumu bua midima (Tangila Efeso 6:12) .

Yone udi utuambila ne, Munkatshi mua bakokeshi mene ba bungi bakamuitabusha; kadi bualu bua Bafalese kabakajukula muanda ewu, batshina ne, Nebatumushe mu nsunagoga. Kusua kuabo kua butumbi bua bantu kuakatamba kusua kuabo kua butumbi bua Nzambi (Yone 12:42,43). Bidi bimueneka ne, Kabakadi bena ditabusha balelela.

Tudi tubala bua balombolodi banene babidi bakaleja ku bienzedi biabo ne bakadi bena kuitabuja ba bushuwa pakadi Mukelenge wetu mushipibua kudi Bena Yuda: Nikodemo,

muyishi wa Bena Isalele, ne Yosefe wa ku Alimatayo, mulumbuludi wa butumbi, bakajika tshitalu tshia Yesu mu lukita lupia-lupia lumbula mu dibue (Yone 19:38-42. Mako 15:43).

Mukelenge Yesu wakamba ne, Biangenzela muntu mudimu, Tatu neamutumbishe (Yone 12:26). Mukelenge Yesu udi Mfumu muimpe, udi musue bena mudimu bende kuikala nende. Yeye neafute bena mudimu bandi bonso (Buakabuluibua 22:12). Nzambi, Tatu wende, neatumbishe bena mudimu ba Muanandi. Pakadi Mose mu Ejipitu, yeye wakasungula kukengeshibue ne bantu ba Nzambi kumpala kua malu mabi a tshitupa tshipi; ubala bipendu bidi bua Kilisto bu bubanji bunene bupita bibutshidibue bia mu Ejipitu bualu bua wakatangila too ne dipingishila dia difutu (Ebelu 11:24-26).

Makenga a Yesu ne kulomba kuende kudi Tatu wende

Katataka mutshima wanyi udi utata, nengambe tshinyi ? Tatu, unsungile mu dikenga dia diba edi. Kadi nakuluila ku diba edi bua bualu ebue. Tatu, utumbishe dina diebe. Diyi diakafuma mu diulu ne, Nakaditumbisha, nenditumbishe kabidi. Bantu bakadi bimane pa buipi bakunvua diyi edi, bakamba ne, Mukungulu wa nvula; bakuabo bakamba ne, Muanjelo wakuakula nandi. Yesu wakandamuna ne, diyi edi kadiakuluila bua bualu buanyi, diakuluila bua bualu buenu (Yone 12:27-30).

Diba diakamana kufika bua Nzambi kuteka “dipila dia bubi bua buonso buetu pambidi pandi” (Yeshaya 53:6). “Yeye nguakadi kayi mumanye bubi, Nzambi wakamuvuija bubi bua bualu buetu; bua tuetu tuikale buakane bua Nzambi munda muandi” (2 Kolinto 5:21). Dinanga dia Nzambi didi dinene be !

Budi nabu Muana wa muntu mbua kubishibua

Katataka dipila dia buloba ebue didiku; nebipate mukokeshi wa buloba ebue. Ne meme, biambishabo pa buloba, nenkoke bantu bonso kundi. Yeye wakamba nunku bua kubamanyisha bua lufu luafueye nalu (Yone 12:31-33).

Ba pa buloba badi bapidia Nzambi ne Muanende, Mukelenge wetu, badi muinshi mua kulumbulula kuende (Yone 3:36).

Ku lufu luende ne dibika ku lufu diende Mukelenge Yesu wakavuija bukokeshi bua mukokeshi wa buloba ebue [Satana] tshianana. Bidi bimueneka ne Yeshaya wakafunda bua bualu buende pakafundeye ne, “Mona muwakuluka mu diulu, wewe mutoto wa nkesha, muana wa lunkelu! Mona muakukushimbulabo too ne panshi pa buloba, wewe nguashimbula bisamba bia bantu ! Wewe wakamba mu mutshima webe ne, Nembande mu diulu, nembandishe nkuasa wanyi wa bukelenge mulu pa mutu pa mitoto ya Nzambi; nenshikame bianyi pa mutu pa mukuna wa disangisha kunfudilu kua luseke lua node. Nembande kulu pa mutu pa matutu, nendivuije bu Nzambi Mutambe wa Mulu. Kadi neupuekeshibue too ne ku Muaba wa Bafue, ku ndekelu wa Tshina tshia Bafue” (Yeshaya 14:12-15).

Misangu isatu Mukelenge Yesu udi ubikila Satana ne, Mukokeshi wa buloba ebue (Tangila Yone 12:31. 14:30. 16:11).

Yesu udi wamba bua mushindu wa lufu luende

Yesu wakamana kuambila ne, “Bu muakabisha Mose nyoka mu nyoka mu tshipela, nunku budi Muana wa muntu nabu mbua kubishibua muomumue” (Yone 3:14). Mukelenge udi wela meji wa lufu luandi ku bianza bia Bena Lomo pa mutshi mutshiamakane. Bena Isalele kabakadi tshilele tshia kushipa bantu pa mutshi mutshimakane, tshiakadi tshilele nangananga tshia Bena Lomo ku tshikondo atshi.

Yesu wakatamba Satana ne bena lukuna bende bonso bukole ku mutshi mutshiamakane. Mukanda wa Nzambi udi wamba ne, Yesu ku lufu luandi wakavuija tshianana udi ne bukole bua lufu, diabololo mene. “Bua yeye apikule bonso aba bakadi bakuatshibue mu bupika matuku onso a muoyo wabo bua ditshina diabo dia lufu” (Tangila Ebelu 2:14,15).

Bualu bua mudimu wa kupikudi Mukelenge Yesu neakoke bantu ba ku bisamba bionso kudiye (Yone 12:32).

Yesu udi munya wa ba pa buloba

Bantu bakamukonka ne, Tuakunvua mu mikenshi ya Nzambi ne, Kilisto udi wikala tshiendelele; apu munyi muudi wamba ne, Budi nabu Muana wa muntu mbua kubishibua ? Ewu Muana wa muntu nganyi ? Yesu wakabambila ne, Nenuikale ne munya munkatshi muenu anu tshitupa tshipi. Endakanayi panutshidi ne munya, butuku kabunuididi; wendakana mu midima kena mumanye kudiye uya. Panutshidi ne munya, nuitabuje munya, nunku nenuikale bana ba munya. Yesu wakamba malu aa, wakumukaku, wakabasokoma (Yone 12:34-36).

Pakadi Yesu pa buloba yeye wakadi munya wa ba pa buloba. Kadi bantu ba bungi bakamupidia. Yesu wakamba ne, “Etshi ntshilumbu tshia bantu ne, Munya wakalua pa buloba, kadi bantu bakasua midima, kabakasua munya, bua bienzedi biabo biakadi bibi” (Yone 3:19). Bikala bantu bananukila kupidia Mukelenge Yesu, mbualu bukole. Nzambi udi mua kufomesha mesu abo bu Yeye wakafofomesha mesu a Bena Isalele kale. (Ténèbres judiciaires).

Yeye [Yesu] wakenza bimanyinu bia bungi ku mesu kuabo, kadi kabakamuitabuja; bua diyi diakamba muprofete Yeshaya dijike ne, Mukelenge, wakitabuja diyi dietu nganyi ? Diboko dia Mukelenge diakamueneka kudi nganyi ? Bua bualu ebu kabakamanya mua kuitabuja, bua Yeshaya wakamba kabidi ne, Yeye wakafofomesha mesu abo, wakakolesha mitshima yabo; nunku mesu abo kaamonyi, kabamanyi mu mitshima yabo, kabakudimunyi mitshima yabo bua meme kubondapa (Yone 12:37-40).

***Mukelenge Yesu utshidi wamba ne,
“Ndi munya wa ba pa buloba;
wandonda kena wendakane mu midima,
kadi neikale ne munya wa muoyo”
(Yone 8:12).***